

平定粵匪紀略卷十三

同治元年壬戌正月江北克復江浦浦口

李提督世忠攻克天長後乘勢進攻江浦浦口約守
壘之賊劉元成單玉功等爲內應正月初四日揮隊
直前賊衆驚潰劉元成等率衆倒戈殺斃僞報王秦
逆僞王宗操天福等七十餘名餘匪搜殺殆盡立復
江浦縣城次日至浦口城下九洲洲援賊鬻至李提
督激勵將弁痛殲之復得其城餘匪竄江邊追殺落
水者無算

浙軍解衢州圍克復常山平陽二縣

逆酋李秀成自陷常山與龍游踞匪同撲衢州府城
慶總督端飭總兵李定泰援勦屢有斬獲逆以大隊
衝撲官軍內外夾擊將賊壘悉數蹋平賊退銅錢嶺
又破之遂克常山城賊向東北竄去是月平陽縣踞
逆亦爲總兵秦如虎勦逐收復縣城

逆匪窺伺上海英法各外國助勦

逆竄奉賢後直撲吳淞口進擾上海縣之東西擺渡
適法國輪船在彼開礮相助斃賊無算賊退分踞天

馬山陳坊橋參將李恒嵩破其壘敗匪退入青浦城
中其浦東大股踞高橋欲斷我要隘美國人華爾約
同英國水師提督何伯法國水師提督卜羅德各帶
中外槍礮隊伍礮船排列海濱華爾與美國人白齊
文撲進賊巢立將賊壘掃蕩各外國自天津就撫紛
集上海貿易極散和好立會防局後薛巡撫等撫綏
駕馭諭以同仇至是竟得協助之力華爾白齊文感
慕華風願更服色爲中國臣民薛巡撫以聞得

旨嘉獎並賞給四品頂戴花翎以示鼓勵薛巡撫卽飭於

松江教兵勇習洋槍協同勦賊稱洋槍隊爲常勝軍
浙軍由徽入浙屢獲大勝開化肅清

逆酋僞輔王楊輔清糾合大股分路竄擾蔓延浙江
開化之張卹等處窺伺衢州左京卿宗棠率練兵由
徽州之婺源入浙連破賊巢陣斬大小賊目六十餘
名生擒二百五十餘名斃賊二千餘名獲僞印五十
餘顆是月十八日復大破賊於馬金陣斬逆首藍以
道計斃長髮悍賊五千餘名生擒二百餘名奪獲大
小僞印九十餘顆開化一律肅清

二月上海軍勦除蕭塘賊壘
自攻破高橋後進擣蕭塘賊壘二月初一日華爾與
副領隊白齊文率常勝軍猛撲各受重傷仍不少卻
破壘五座官軍亦分路兜勦斬擒極多

楚軍進勦安徽廬州毀賊壘卡

副都統多隆阿率楚軍由舒城進勦廬郡漸次逼城
逆乘我築營未堅出賊六七千人分股來撲我以馬
隊包抄分路直前斃賊五六百名二月初一總兵雷
正綰率隊渡河焚其礮船及買賣街初二四等日復

飭雷正綰與記名總兵石清吉等攻破賊卡四處木
城四道西門得勝門賊壘四座連日斃賊三千餘名
安徽潁州解圍

逆匪糾合捻股圍困潁州挖掘重濠密排鹿角以阻
官軍進攻之路布政使賈臻被困力保危城正月初
賊用地雷轟闕東北關營牆率衆上撲游擊范文英
李安邦裹創力堵適起狂風煙燄回撲賊陣我軍將
闕口堵合時勝大臣由太和縣督兵馳援初三日砍
砦衝入賊壘斃賊千餘賈布政在城巡瞭見勝軍得

手亦整隊出城夾擊破北面賊巢賊東竄我軍乘勢
掃蕩蹋毀東西南三面賊壘三十七座城圍立解
皖軍克復店埠要隘

店埠在廬州東北三十里爲定遠赴廬要隘前和提
督福巡撫攻勦時屯重兵於此逆築石城極堅皖軍
亟攻之逆首僞英王陳玉成由廬城添派賊首卜姓
協守總兵張得勝乘夜前往直抵石城一擁而入立
將卜賊砍倒賊衆驚潰追殺十餘里遂克店埠

三月福建延邵建遺缺道李鴻章統領湘淮諸軍東下

先是曾中堂議以曾布政使國荃由陸路先攻和州
巢含各州縣李道統領諸軍乘勝東下曾馮提督于
材軍由鎮江進勦而上海賊氛日逼勢甚危吳署布
政使籌借餉銀二十餘萬兩由會防局僱備輪船仍
遣厲學潮錢鼎銘先後赴安慶迎師到時曾布政使
全軍已次第前進李道軍前隊亦將開行錢鼎銘厲
學潮昏夜叩中堂營力陳上海危困及可進兵狀籌
議終夜中堂許之遂改令李道率程學啓等軍十一
營於三月初七日乘輪船東下初十日抵上海營城

南淮揚鎮黃翼升統領水軍相繼來會

三月揚州軍勦退渡江逆衆

逆匪由金陵下擾糾合蘇州之衆計十餘萬人渡江
撲揚州都將軍與阿知賊衆且銳嚴約各營勿輕出
戰俟賊至近登壁擊之賊傷亡甚多退而赴鄉掠食
三月十三日我軍至徐家集等處誘賊出卡殺斃四
百餘名十六日賊由法海寺起至虹橋七里甸等處
排列長陣都將軍督隊出擊直趨虹橋翼長徐州鎮
總兵詹啓綸副將左起龍由三汊河率隊抄擊各斃

賊四五百名十七日逆等選洋槍隊衝至西門外列
於河西此隊爲張提督玉良舊部在蘇州從逆者極
跳浪廣西平樂協副將刁經明等覓水往攻賊以大
隊壓下我軍驟退儘先都司廖長明率驍騎勇五百
人奮勇衝過十餘回合賊始漸退各軍轉身再戰大
敗之追殺十餘里始歸後數日復派隊分路攻擊賊
退往儀徵

皖軍奪取駐馬邨要隘

金陵逆渡江爲李提督世忠擊走竄踞安徽和州之

駐馬邨依險築壘以通由南竄北之路李提督飭總
兵王茂元等由林浦等處分道進攻衝爲兩截賊棄
壘狂奔我兵沿江趕殺所有賊壘一律蹋毀立將駐
馬邨要隘奪回

鮑軍克復青陽縣

曾大臣派浙江提督鮑超於上年十二月進攻青陽
壘破援賊本年二月十五日飭副將劉順隆等先平
西北門山觜賊壘濬治長濠爲四面合圍計城賊勢
蹙潛糾浙江死黨三萬餘衆進撲銅陵冀分我軍之

勢以解青陽之圍三月初六日鮑提督由青陽分軍
親率赴援初七日遇賊於橫塘飭三路進攻又令左
右抄擊賊恃衆悍迎拒兩時副將王衍慶等大呼陷
陣副將顏紹榮等潛取小徑繞襲賊後知府伍華瀚
等分領馬步四出盪決遂將橫塘等處百餘卡二十
六壘一律剷除先是僞奉王古隆賢偵知鮑提督分
兵而北陰統涇太惶賊在青陽南門外豬婆店增築
九壘將欲阻我之師以通糧路適鮑提督已振旅而
還遂於十五日督飭將士拔開鹿角躍過濠溝不逾

時而九壘悉毀自是軍心愈壯賊膽愈寒鮑提督知
青陽利在速攻乃於十六日秣馬蓐食銜枚疾進諸
將弁裹創血戰志在必得劉順隆等攀堞先登衆軍

乘之登時將縣城克復

曾營水陸各軍擊敗竄匪舊縣荻港等處肅清

蕪湖首逆僞堵王黃文金等糾黨二萬突入荻港三
月初四日復分股竄陷繁昌之舊縣勢將下伺三山
峽初五日水師營官李朝斌等在營房背擊賊獲勝
遂率所部駛上舊縣會合營官萬化林等登陸襲賊

排礮環轟賊負創潰走初六日亦多斬獲逆不敢踞
卡專事野掠潛約荻港一股勾結繁昌蕪湖魯港之
賊別圖窺竄時同知曾貞幹陸師進駐三山峽距舊
縣三十里密諭各營堅壁以待十三十四等日賊果
分道來犯曾貞幹卽率各營及螃蜞磯水師循江岸
而進一敗賊於洋夾河再敗賊於三華山賊始悉衆
遠遁荻港等處一律肅清

河南南陽府戒嚴

楚軍攻安徽廬州甚急僞英王陳玉成密令僞扶王

陳得才率黨三萬餘人勾合捻匪孫光危陳大禧兩
股約二萬餘人由河陽唐縣直逼河南南陽府城以
圖分我兵力河南鄭巡撫元善駐師許州派兵勇馳
援湖北官大臣等亦派總兵何紹彩領新訓八營由
宜昌移營赴隨棗襄樊探蹤會勦並咨陝西瑛巡撫
檄迅撥重兵以防商維

賊撲江南三山峽官軍併力擊退乘勝克復繁昌縣
偽匡王賴文鴻竄入繁昌縣糾約彼處踞匪撲我三
山峽官營同知曾貞幹升高瞭望見旌旂掩映山谷

間往來如織乘逆未逼營督率各軍分道馳勦賊隊
更番迎撲我軍槍礮齊施乘風縱火羣賊大亂殪其
魁吳大觜敗匪退踞繁昌城內不敢復出曾貞幹以
有隙可乘定計潛師襲之三月二十日夜掩旂息鼓
進薄城下束薪爲炬列礮環攻賊衆奔潰薄城將士
從西北闕處猱升而上衆軍一齊擁入遂於二十一
日克復繁昌縣城

水陸各軍克復巢縣含山縣和州三城攻奪銅城牯雍
家鎮裕溪口西梁山四要隘